

S P O R A Z U M

**o saradnji Federalne agencije za upravljanje oduzetom
imovinom i Sudske policije Federacije Bosne i Hercegovine**

Federalna agencija za upravljanje oduzetom imovinom (u daljem tekstu: Agencija) koju predstavlja Kenan Kapo, direktor, i

Sudska policija Federacije Bosne i Hercegovine (u daljem tekstu: Sudska policija) koju predstavlja Edin Vehabović, glavni zapovjednik Sudske policije, zaključili su

S P O R A Z U M

o saradnji Federalne agencije za upravljanje oduzetom imovinom i Sudske policije Federacije Bosne i Hercegovine

I OPŠTE ODREDBE

Član 1.

Ovaj sporazum se zaključuje sa ciljem stvaranja potrebnih preduvjeta za izvršenje sudskih odluka vezanih za oduzimanje imovinske koristi u smislu odredbi Zakona o oduzimanju nezakonito stečene imovine krivičnim djelom ("Službene novine Federacije BiH", broj 71/14) (u daljem tekstu: Zakon o oduzimanju nezakonito stečene imovine krivičnim djelom), odnosno unapređenja saradnje Agencije i Sudske policije.

Član 2.

Potpisnici su saglasni da se ovim sporazumom definišu nadležnosti, načela, predmet saradnje i pružanja pomoći u skladu sa nadležnostima proisteklih iz zakonskih i podzakonskih propisa.

Član 3.

Ovim sporazumom se određuju osnove saradnje, uloge, obaveze i odgovornosti potpisnika ostavljajući mogućnost da se kasnije dodatno, preciznije i detaljnije utvrđuje njegov sadržaj ili pojedini djelovi sadržaja.

II NADLEŽNOSTI

Član 4.

(1) Agencija je u smislu odredbi Zakona o oduzimanju nezakonito stečene imovine krivičnim djelom nadležna za upravljanje privremeno oduzetom i oduzetom imovinom, provođenje analiza u području oduzimanja imovinske koristi pribavljene krivičnim djelom, stručnu edukaciju iz područja finansijskih istraga i oduzimanja imovinske koristi pribavljene krivičnim djelom, skladištenje, čuvanje, prodaju, najam oduzete imovine, stručnu procjenu vrijednosti privremeno oduzete i oduzete imovine po odredbama ovog i drugih zakona, vođenje evidencija o imovini kojom raspolaže i upravlja, sudskim postupcima u kojim se odlučuje o takvoj imovini i obavljanje i drugih poslova predviđenih Zakonom.

- (2) Odredbom člana 24. stav (4) Zakona o oduzimanju nezakonito stečene imovine krivičnim djelom propisano je da sud provođenje rješenja o izvršenju na osnovu presude kojom se oduzima imovinska korist pribavljena krivičnim djelom može u potpunosti ili djelimično povjeriti Agenciji, a odredbom člana 25. stav (4) istog zakona da su državni i drugi organi, javne službe i organizacije obavezne pružiti pomoć Agenciji u njenom radu.

Član 5.

Sudska policija je u smislu odredbi Zakona o sudskoj policiji („Službene novine Federacije BiH“, br. 19/96 i 37/04), zakona o pravilima postupka i odredbi Pravilnika o načinu vršenja poslova i rukovođenju u Sudskoj policiji („Službene novine Federacije BiH“, broj 32/14), nadležna za osiguranje informacija, dovođenje svjedoka, osumnjičenih osoba, optuženih osoba i vještaka, lišenje slobode osuđenih osoba i osoba kojima je određena mjera pritvora, održavanje reda u sudnici i prostorijama tužilaštva, sigurnost nosilaca pravosudnih funkcija i zaposlenika u pravosudnim institucijama, sigurnost zgrada pravosudnih institucija, osiguranje prisustva pozvanih svjedoka i zaštita svjedoka, sprovođenje osuđene osobe u organ za izvršenje sankcija u kojem treba izvršiti izrečenu sankciju, pretresanje stana i osoba, privremeno oduzimanje predmeta, provođenje naloga u vezi s osiguranjem izvršenja sudskih odluka i provođenje drugih naloga pravosudnih institucija za poduzimanje radnji kojima se osigurava uspješnost vođenja odgovarajućeg postupka.

III NAČELA

Član 6.

Agencija i Sudska policija su saglasne da će u svim predmetima u kojima je za izvršenje sudskih odluka od strane suda zadužena Agencija i Sudska policija poslove u okvirima svojih nadležnosti izvršavati u cilju efikasnog izvršenja sudskih odluka vezanih za oduzimanje nezakonito stečene imovine krivičnim djelom.

IV PODRUČJA SARADNJE

Član 7. (Operativna saradnja)

- (1) Sudska policija se obavezuje da će u skladu sa naredbom nadležnog suda za pružanje asistencije Agenciji prilikom postupanja Agencije u skladu sa odredom člana 24. stav (4) Zakona o oduzimanju nezakonito stečene imovine krivičnim djelom, a shodno procjeni stepena složenosti operativne aktivnosti te raspoloživim personalnim i materijalno tehničkim kapacitetima, Agenciji pružiti potrebnu pomoć kako bi se osiguralo sigurno i efikasno izvršenje sudske odluke vezano za oduzimanje nezakonito stečene imovine krivičnim djelom.
- (2) Pomoć iz stava (1) ovog člana podrazumjeva poduzimanje mjera i radnji od strane službenika sudske policije u obimu i na način uređen podzakonskim aktima Sudske policije kojim je propisana procedura postupanja Sudske policije prilikom pružanja asistencije sudu.

- (3) Sudska policija i Agencija su saglasne da pomoć u skladu sa odredbom stava (1) i (2) ovog člana, a kada se radi o pokretnoj imovini i kada to sigurnosni uslovi zahtjevaju, podrazumjeva stvaranje potrebnog sigurnosnog ambijenta od početka provedbe odluke suda do momenta kada se oduzeta pokretna imovina, u skladu sa odlukom suda i pravilima Agencije deponuje na skladište.
- (4) Agencija se obavezuje da će u slučajevima kada joj je povjerena realizacija rješenja o izvršenju Sudskoj policiji pružiti raspoložive informacije potrebne za provođenje procjene stepena složenosti operativne aktivnosti, kako bi se usaglasilo zajedničko djelovanje koje za cilj ima sigurno i efikasno izvršenje sudske odluke vezano za oduzimanje nezakonito stečene imovine krivičnim djelom.

Član 8.
(Edukacija i drugi vidovi saradnje)

- (1) Agencija se obavezuje da će u okviru izvršenja poslova iz člana 30. stav (1) tačka c) Zakona o oduzimanju nezakonito stečene imovine krivičnim djelom u stručne edukacije na temu oduzimanja imovinskih koristi uključivati službenike sudske policije.
- (2) Agencija i Sudska policija se obavezuju da će po potrebi vršiti analizu pravnog okvira i drugih pitanja vezanih za realizaciju rješenja o izvršenju, te će kod nadležnih organa zakonodavne, izvršne i sudske vlasti ili drugih relevantnih tijela inicirati izmjene i dopune zakonskih i podzakonskih propisa i rješavanje drugih pitanja potrebnih za efikasnu realizaciju rješenja o izvršenju.

V NOSITELJ POSLOVA SARADNJE

Član 9.

- (1) Nositelj poslova saradnje će se organizovati na nivou Agencije i Sektora za operacije i sigurnost Sudske policije.
- (2) Sudska policija će pomoć Agenciji u skladu sa odredbama ovog Sporazuma pružati u okvirima osnovnih organizacionih jedinica Sudske policije.

Član 10.

Ovaj sporazum stupa na snagu danom potpisivanja.

POTPISNICI SPORAZUMA:

**Federalna agencija za
upravljanje oduzetom imovinom**

DIREKTOR

mr.sc. Kenan Kapo

Broj: 01-06-278/16
Sarajevo, 26.01.2017. godine

**Sudska policija
Federacije BiH**

**GLAVNI ZAPOVJEDNIK
SUDSKE POLICIJE F BiH**

Edin Vehabović

Broj: Sp-01-2057-3/16
Sarajevo, 26.01.2017. godine